

Мушрикларнинг даъволари мутлақо нотўғри | Қуръони Карим дарслари (165-дарс)



19:00 / 11.08.2025 1527

Аллоҳ таоло Фурқон сурасида шундай марҳамат қилади:

«Куфр келтирганлар: «Бу (Қуръон) уйдирмадан бошқа нарса эмас. Уни ўзи тўқиб олди ва бунда унга бошқа қавмлар кўмак бердилар», дедилар. Бас, шубҳасиз, зулм ва ёлғон гувоҳлик келтирдилар.

«Бу аввалгиларнинг афсоналаридир. Уларни ёздириб олган. Улар унга эртаю кеч имло қилинур», дедилар.

«Уни осмонлару ердаги сирни биладиган Зот нозил қилди. Албатта, У Ғофурдир, Роҳиймдир», дегин», деган (4-6-оятлар).

Макка мушрикларининг «Қуръон Муҳаммад томонидан тўқиб олинган нарсадир», деган маънодаги бу гапларининг ўзи тухмат эканини ҳамма яхши билади.

Уларнинг ўзлари, хусусан, бошлиқлари Қуръон башарий калом эмаслигини такрор-такрор тасдиқлар эди. Шу билан бирга, кўпчиликка «Қуръон Муҳаммаднинг уйдирмаси», деб ифво тарқатар эди.

Энди мушриклар уйдирмасининг иккинчи:

«Бунда унга бошқа қавмлар кўмак бердилар», деган қисмига назар ташлайлик. Бу билан мушриклар «Муҳаммадга Қуръонни уйдиришда бошқа қавмлар ёрдам берган», дейишмоқчи.

Ўша пайтда «Бошқа қавмлар кимлар?» деб сўралганда, мушриклар «Аҳли китоблар», деб жавоб беришган.

Демак, мушрикларнинг даъвосича, Муҳаммад соллаллоҳу алайҳи васаллам ўзларига янги дин яратиш мақсадида бир китоб ёзишга қарор қилганлар. Бу ишни ишончлироқ чиқариш мақсадида эски илоҳий китобларга ўхшатишга ҳаракат қилиб, аҳли китоблардан, яъни яҳудий ва насоролардан ёрдам олганлар. Хўш, яҳудий ва насоролар Муҳаммад соллаллоҳу алайҳи васалламга ўз кирдикорларини фош қилишда, жиноятларини ошкора этишда, бузуқ эътиқодларининг шармандалигини баён қилишда ёрдам берибдиларми? Қуръонда яҳудий ва насороларнинг ҳар бобдаги хатолари баён этилган-ку!

Демак, мушрикларнинг бу даъволари мутлақо нотўғри. Улар бу даъво билан:

«Бас, шубҳасиз, зулм ва ёлғон гувоҳлик келтирдилар».

Уларнинг бу гапларида Муҳаммад соллаллоҳу алайҳи васалламга нисбатан зулм бор, Қуръони Каримга нисбатан зулм бор, ҳақиқатга нисбатан зулм бор, Аллоҳ таолога нисбатан зулм бор. Уларнинг бу гувоҳлиги ёлғон гувоҳликдир.

Кофирлар Қуръони Карим ҳақида ушбу уйдирма ва бўхтон ила кифояланиб қолмадилар.

«Бу аввалгиларнинг афсоналаридир. Уларни ёздириб олган. Улар унга эртаю кеч имло қилинур», дедилар».

Кофирларнинг Қуръони Карим ҳақида бир ундай, бир бундай дейишларининг ўзи ҳам уларнинг даъволари асосли эмаслигига далилдир. Уларга асоснинг кераги ҳам йўқ, бир оз ўзларининг бузуқ ақллари ва фосид мантиқларига илашадиган жойи бўлса, бас, ўшани гап деб гапираверадилар. Қуръондаги ўтган умматлар ҳақида келган қиссалардан хабардор бўлганларидан кейин: **«Бу аввалгиларнинг афсоналаридир»**, дедилар.

Қуръон аввалгиларнинг афсонаси бўлса, Муҳаммад соллаллоҳу алайҳи васаллам бу афсоналарни қаердан олибдилар?

«Уларни ёздириб олган», дедилар.

Аввалги мушриклар ҳар қанча жоҳил бўлсалар ҳам, ҳозиргиларга қараганда бир оз инсофли бўлишган экан. Улар ҳозирги мушрикларга ўхшаб, «ёзиб олган» демасдан, «ёздириб олган» демоқдалар. Чунки улар Муҳаммад соллаллоҳу алайҳи васалламнинг ўқиш ва ёзишни билмасликларини яхши биладилар. Шунинг учун «Афсоналарни бош-қаларга ёздириб олган», дейишди. Яна:

«Улар унга эртаю кеч имло қилинур», дедилар».

Яъни улар «Ўша афсоналар Муҳаммад соллаллоҳу алайҳи васалламга эртаю кеч айтиб турилади», дейдилар.

Кофир-мушрикларнинг бу уйдирмасига қандай жавоб беришни Пайғамбаримиз соллаллоҳу алайҳи васалламга Аллоҳ таолонинг Ўзи ўргатади:

«Уни осмонлару ердаги сирни биладиган Зот нозил қилди. Албатта, У Ғофурдир, Роҳиймдир», дегин».

Қуръонни ҳамма нарсани билгувчи Зот – Аллоҳ нозил қилган. Ҳамма нарсани билгувчи Зот ўтган умматларнинг тарихини ҳам жуда яхши билади. Ўтганларнинг афсоналарини бировдан ёздириб олишга ҳожат йўқ. Балки бу афсоналар ёлғон, бидъат ва хурофотларга тўлиқдир.

Қуръони Каримда эса ўтган умматларнинг қиссалари энг рост ва тўғри равишда келтирилади. Кишилар улардан ўрнат олишга чақирилади. Вақт ўтиб, илм ривожланиши билан бу ҳақиқат яна ҳам равшанлашиб бормоқда.

Мушриклар фақат Қуръони Карим ҳақида эмас, Муҳаммад соллаллоҳу алайҳи васаллам ҳақларида ҳам турли уйдирмалар тўқидилар.

«Ҳадис ва ҳаёт» китобининг 30-жузи

Ўзбекистон Республикаси Дин ишлари бўйича қўмитанинг 2024 йил 23 январдаги 03-07/362-рақамли хулосаси асосида тайёрланди.